

Obraćanje člana Predsjedništva BiH Bakira Izetbegovića na svečanosti polaganja kamena temeljca za Islamski kulturni centar i džamiju u Ljubljani, subota 14.9.2013.

Poštovana premijerko Bratušek, gradonačelnice Janković, monsinojore Glavan, ministre Al-Kuwari, uvaženi reisu-l-ulema Kavazović, muftija Grabus, dragi prijatelji,

Esselamu alejkum i dobar vam dan!

Sretan sam što danas prisustvujem ovoj izuzetnoj svečanosti dijeleći radost sa Bošnjacima i svim muslimanima Ljubljane i cijele Slovenije koji će uskoro dobiti svoj dom - moderan Islamski kulturni centar i džamiju.

Nije ovo poseban dan samo za muslimane, ovo je izuzetno značajan datum za građane evropske Slovenije opredijeljene za demokratiju, uvažavanje različitosti, poštovanje temeljnih ljudskih prava i sloboda.

Hvala Republici Sloveniji, hvala gradu Ljubljani što su podržali projekat dajući potrebne dozvole i saglasnosti za gradnju ovog zdanja.

Hvala svim ljudima dobre volje, vladama prijateljskih država i organizacijama koji svojim angažmanom, svojim dobrovoljnim priložima i donacijama pomažu muftiji Grabusu i njegovim saradnicima u ovom historijskom projektu.

Izraze posebne zahvalnosti upućujemo našim prijateljima iz Katara. Molim ministra Al-Kuwarija da naše posebne selame prenese katarskom emiru i njegovoj Vladi.

Slovenija i muslimani su se davno upoznali.

Prva džamija izgrađena je u Logu pod Mangrtom, u vrijeme Velikog rata 1916. godine.

Tada su Bošnjaci ratovali i ginuli na Soškom frontu.

Hiljade su ostavili svoje kosti u vrletima Alpa.

Jedno cijelo stoljeće poslije, Bošnjaci žive u miru i slobodno u Sloveniji i svojim radom doprinose njenom prosperitetu.

I ovo zdanje za koje kamen temeljac danas postavljamo i u koje će akobogda za koju godinu useliti, bit će njihova druga kuća, dom za molitvu i obavljanje vjerskih dužnosti, ali i mjesto okupljanja, razgovora, mjesto za porodično i prijateljsko druženje i međusobno upoznavanje.

Bit će to stožerno mjesto za afirmaciju tradicionalnih bošnjačkih vrijednosti i ukupnosti našeg identiteta kroz povijest.

Naše različitosti su naše bogatstvo, a ne mana ili nedostatak.

Njihovo uvažavanje, demokratski dijalog i međusobno poštovanje temelj su stabilnog socijalnog života u svakoj zajednici.

Mi muslimani vjerujemo u ajet iz Kur'ana časnog u kojem stoji da je „Bog različite narode na zemlji stvorio kako bi se upoznavali“.

I još nam nešto, također Kur'an naređuje - „Natječite se u dobru...“

Upravo puna afirmacija ovih univerzalnih istina i principa najsnažniji su temelji na kojima trebamo graditi zajednički život sa svim našim posebnostima i u atmosferi punog međusobnog povjerenja i pouzdanja u zajedničku budućnost.

Nikad ne smijemo pristati i prihvatiti dominaciju predrasuda i ignorancije.

Kao odgovorni ljudi moramo učiniti sve da se bolje razumijemo i da jedni o drugima učimo s puno dobre volje, međusobnog respekta i iskrenosti.

I realizacija ovog historijskog projekta čiji početak svečano obilježavamo, doprinos je tim našim težnjama.

Neka danas, uz ovaj ugaoni kamen za Islamski centar i džamiju, bude postavljen i onaj bitniji, duhovni temeljac novom i još boljem i intenzivnijem suživotu i saradnji naroda u Sloveniji i cijeloj Evropi.

Poštovani prijatelji,

Uvjeren sam da će Bošnjaci, kao slobodni i ravnopravni građani, i njihova Islamska zajednica, nastaviti kontinuitet davanja svog punog doprinosa demokratskom razvitku Republike Slovenije, ali da će biti i most dobre saradnje dvije prijateljske države.

Evropa će, u to nema nikakve sumnje, uskoro biti naš zajednički dom.

Narodi i građani Bosne i Hercegovine to žele i zaslužuju, unatoč svim poteškoćama sa kojima se na svom integracijskom putu suočavaju.

Čestitam vam početak izgradnje Islamskog kulturnog centra i džamije u Ljubljani, i neka nam Bog svemogući, i svi dobri ljudi među nama, nastave davati podršku na putu mira, saradnje i prosperiteta. Hvala vam!